

Was merr so babbelt

Honnes? Ho-nnes?
Was iss?
Ei wo bisde dann?
Ei im Keller. Ich kumm gleich enuff.
Doo bisde joo.
Was hosden?
Deesde merr grad emol was oikaafe?
Was brauchdsde dann?
Nor e bisje Milch, ferr de Budding.
Unn was ferr Milch brauchdsde?
Doo steht „Frischmilch“ druff, die findsde ...
Ich waaß wo ich die finn. Ich geh gleich.
Hosde Geld?
Nodierlich. Unn sunnst brauchdsde nix?
Naa. Awwer wennde widder doo bist ...
Was sollen ichen dann mache?
Dann schmeißde e paar alde Zeidunge fort.
Werrds Babier die Woch abgehollt?
Ja, iwvermoie.
Gut, mach ich.
Schreib derrs uff. Weil du aach ...
Was dann noch?
In de Garaasch leit so vill Krempel erum.
Gut, den lad ich ins Audo unn fahrn uff die Deponie.
Unn wennde grad debei bist ...
Was hosden jetz noch?
In doine Stubb missde mol e bisje uffroome.
Mach ich aach, mach ich alles.
Hosde derr alles uffgeschriwwe?
Brauch ich nit. Awwer jetz geh ich oikaafe.
Honnes? Setz dich emol.
Ei warum dann, ich will jetz fort.
Setz dich emol, ich will doin Puls fiehle.
Moin Puls? - ferr wassen dess?
Weil ich glaab dassde kronk bist.
Ich unn kronk? Wie kimmsden doo druff?
Weil de heit koo Widderwort gewwe host?
Koo Widderwort?
Wie ich derr alles gesacht habb was ze mache iss.
Ooch, dess mach ich doch gern.
Odder iss was? Hosde was kabutt gemacht?
Naa.
Willsde widder mol e schwarz Partie mache?
Naa, aach nit.

Nit mett doine Kumpels in die Drosselgass?
Naa, wirklich nit. So, jetzt geh ich.
Unn warum bisde heit so ... so folchsam?
Dess bin ich doch immer, odder nit?
Odder willsde mol widder enn Kuche gebacke hawwe?
Enn Kuche? Ich? – enn Kuche gebacke hawwe?
Ja du. Eraus mett de Sprooch.
No ja - enn Blitzkuche kennsde mol widder backe.
No siehsde. Awwer warum dann enn Blitzkuche?
Weil e Schwarzwälder Kerschtort zu vill Arweit mecht.
Awwer du host doch heit aach vill Arweit.
Ja, habb ich. Du moonst ...?
Dassde derr e Schwarzwälder Kerschtort verdient host.
Moonsde wirklich?
Na klar. Weil du host ja dann aach noch die Gass ze
kehrn unn doi Audo ze sauche unn ...